

## Die verstehn sich nit

Om letzde Sunndaach hawwe merr enn Spaziergong uff die Wart gemacht. Doo konnsde enn Haufe Leit sehe, ältere unn jüngere, Eltern mett Kinner, unn vor allem Pärcher, die Händcher halle unn voller Begeisterung iwwer Fleerschem unn dess gonze Gebiet vor unns driwwer eweck gucke.

Uff oomol sacht de Schorsch: Gucke mol, die babbelt deitsch unn der babbelt waswaaß-ichwas unn trotzdem verstehe die sich.

Dess iss die Körpersprooch, habb ich gelacht, dess iss ebbes, was mir Alte so nit mehr beherrsche.

Unserooner, sacht de Karl, brauch immer e paar Worte, so junge Leit awwer brauche nur ihr Aache unn ihr Händ. Doo fließe gonz onnern Ström als bei uns, ob dess bei uns aach emol so war?

Ei sicher, moont de Schorsch, awwer so ebbes verlernt merr halt, wenn merr älter werdd unn aach nimme so vill Leit kennelernt.

Ich finn dess schee, habb ich gesacht, aach wenn ich so ebbes im Fernseh seh, krieg ich immer feuchte Aache. Oons merk ich awwer immer mehr, die junge Leit halles nimmi so long mettenonner aus wie mir. Die kriehe gleich Krach, weilse aach selbstännich sinn, ihr Wohnung unn ihr Audo hawwe, ihrn Beruf unn ihr Geld sowieso, dann saache halt gonz schnell, mach doin Kroom alloo.

Merr kann halt nit alles hawwe, sacht de Karl, awwer ich denk monchmol, dass ich nit froh bin dass ich so alt bin, awwer froh bin, dass ich vill hinner mir habb, mir duen monchmol nor die Kinner unn die Enkel laad.

Also doo muss ich derr mol ebbes von unserm Freund Hubert erzähle, der war doch letztens drei Woche in de Reha. Als der hoomkumme iss, war der gonz verännert unn hott alls in die Luft geguckt unn waaßde aach warum? Der hott dort e Fraa kenne gelernt, die geschiede war unn die emm gut gefalle hott. Er hättse aach emol gedrickt, awwer sunnst wär nix gewese, hotter gesacht. Trotzdem isser nimmi so wie er war. Er moont dauernd, dasser was verbasst hott, weiler joo aach nimmi de Jüngste iss unn weil ess Lewe so schnell vorbei geht. Honnes, hott er zu mir gesacht, ich habe eine andere Frau kennen gelernt, aber ich werde sie nicht mehr wiedersehn, über vieles nachgedacht. Ich hatte früher immer Träume, wollte in Gran Canaria ein Haus haben und dort in ewigem Sonnenschein leben. Meine Frau wollte nie dort hin, und jetzt habe ich eine Frau kennengelernt, die sofort mit mir auf die Inseln gehen wollte.

Doch ich habe Nein gesagt, ich bleibe hier und bleibe bei meiner Frau und weißt du auch warum? Nicht weil ich keinen Mut zur Veränderung hätte, nein, weil ich die Ruhe und die Beständigkeit liebe – und weil ich ihr nicht weh tun will, ich schätze sie, sie hat mich so lange auf meinem Lebensweg begleitet, ich weiß was ich an ihr habe.